

# «Il chantun vul esser in partenari fidà per noss' economia»

La schefa da finanzas dal Grischun è persuadida da las mesiras per l' economia

CUN BARBARA JANOM STEINER  
HA DISCURRÌ AUGUSTIN BEELI / ANR

■ **A la conferenza da medias che ha gì lieu ier ha cussegliera governativa Barbara Janom Steiner preschentà il preventiv 2017. En il center da quel è stada la distgargia da taglia per persunas giuridicas. La communicaziun da medias dal departament da finanzas è vast è pulpi cun cifras. Tranter auter quinta il preventiv da l'onn proxim cun investziuns da record da 274 milliuns francs. Quai saja ina mesira per stimular l' economia, ha declerà la schefa da finanzas dal chantun Grischun. Per interpresas e societads è schizunt en vista ina reducziun da taglia.**

*A la conferenza essas Vus sa focussada sin la reducziun da taglias per persunas giuridicas. Il pe da taglia per societads ed interpresas duai sa sbassar sut 14 pertschient. Essas Vus persuadida che quai vegn a far l'effect giavischà, numnadamain stimular l' economia?*

**Barbara Janom Steiner:** Gea, jau sun persuadida che quai vegn a dar impuls. Cler, i sa tracta d'ina reducziun moderada dal pe da taglia, e nus vegin a sentir quella pir davent da l'onn 2018. Per il chantun munta quai otg milliuns damain entradas, per las vischnancas èsi 3,4 milliuns. Igl n'è betg ina gronda midada, igl è dentant in sustegn cler per l' economia grischuna che è en ina situaziun difficila. Nossa situaziun solida da las finanzas lubescha da far questa proposta per mauns dal cussegl grond.



Barbara Janom Steiner, la ministra da finanzas dal chantun Grischun.

FOTO Y. BÜRKL

***Da princip èsi ina pitschna reducziun dal pe da taglia. È quai sufficient per stimular l' economia?***

Trair natiers firmas è ina da las strategias cleras che questa reducziun ha en mira. Nus pudain dentant sbassar cun questa mesira la chargia totala da taglia sin il gudogn da las interpresas e societads oz 16,7 giu sin 16,1 pertschient. Quai augmenta l' attractivitat grischuna

pareglià cun auters chantuns. A lunga vista vegin nus a stuair sbassar vinavant quest pe da taglia sut 15 pertschient.

***E cura datti ina reducziun per tuts, cura profitescha mintga pajataglia d'in pe da taglia pli bass?***

I fiss natiralmain bun da pudair communigar oz ina reducziun per tuts, e

betg mo per interpresas e societads. Bleras persunas natiralas profiteschan dentant gia oz. Igl è impurtant da savair ch'il Grischun è in chantun attractiv pertutgant la chargia da taglia da persunas natiralas. En la media, e guardà generalmain, essan nus in dals chantuns pli favuraivels. Nus essan sin il 5avel rang, quai oravant tut perquai ch'il Grischun lubescha generusas reducziuns per ils uffants. Entant ha ussa l' econo-

mia la preferentscha, il chantun vul e duai esser in partenari fidà per quella.

***Tar las investziuns dal 2017 n'avais Vus ditg nagut pertutgant il project «Sinergia», la nova chasa administrativa ch'il chantun bajegia a Cuira per 100 milliuns francs.***

Il project «Sinergia» è da chattar en il budget 2017, el è inditgà cun ina summa da nov milliuns francs per l'onn proxim.

***Vus avais declerà ch'i sa tractia d'in preventiv rigid e fitg restrictiv. Entant s'augmentan las contribuziuns per ils ospitals e las clinics. Cura datti là ina restricziun e sbassament da contribuziuns?***

Gea, da princip avessi da dar midadas en il sector sanitar. Qua valan dentant directives e normas naziunalas. Sco chantun n'avain nus naginas pussaivladads da midar insatge, da snajar las contribuziuns u d'influenzar ch'i dat sbassaments dals custs. Il medem vala dal rest era per il sector social.

***Tar il project «Olimpiada 2026» n'avais Vus era betg ditg insatge. Èn quels custs per la candidatura betg en il budget 2017?***

L'olimpiada n'è betg inclusa en il budget 2017. Quai è in credit ch'il cussegl grond ha da decider il december proxim e lur vegn la summa integrada en la planisaziun. Cun ils meds finansials che nus avain e cun l'agen chapital è questa expensa finanziabla.